

Timotini Luhuva Nampa

2 Pauló Gizo Amimó

Timotini nónohá amike gizo ami gakó

1 ^{1^a} Neza Paulona Izesu Kilistotoka voko gímizekugo alévolé lekemetamenigi minatave loko lo mololeta gakóma lo utó itove loko Ómasímuni gakotó imane Izesu Kilistoni aposolo loló oko noutímína, ²Timotiga, monó gapoló gelémo muluke gelémo lá uke nigika gemenou ve luhuva imane gizo nogumuve. Ómasi ameteho itó Guivahanite Izesu Kilistó eza nasahilí ogetoko agika hize gemeko hulu ale utó ogetino.

Timotinimú Ómasi agepoka like agika ale kii lota gakó

³Avónege kigika lamanaki minake, omolelé amalelé iki Ómasi gelekelé itiki minamómáminoko nénisi nigikagú gakó nomigo Ómasi gelekelé otuke agepoka loaká noumó nene, gamena gamena únaká neteká geikumú gele minuke Ómasiloka loaká nouve. ⁴Makotoka vinogo nougo nenikumú ive nama animó nene gele minuke, voko áinigogimikinake mulúnegú agila guluma napa itive loko geleaká nouve. ^{5^b} Ómasimú gele alévolé oaká gihila nene geitoka nemó nene gele nominuve. Itó atekaho Loísí itó izokaho Zunísí goí iki Izesukumú gili alévolé inasigo geza ámináminoko gele alévolé onane loko gele guni onouve. ⁶Nenemú gelekuke, lokugo, gakó imane goha gilitanize. Neza gotokaló nigizani molokugo Ómasímó monolímuni zámúza lehizegetamó nene, gizapa lamaná oko ale otenako, ló guluma ino. ⁷Lá nooko, láa loko gelezo: Ómasímó nene nemú manamú lelegesá legeakalímuni lemetameni lehizeletamimóma neve. Amúza moloko ligikatunú nasahilí oketoko ligika lugupe gizapa itave loko lemeneimóma neve.

⁸Nenemú Guivahanitémini gakó lamaná lo utó itanikumú govoza helemino. Lá nooko aí hozamule loko kalapusi numukú noumómave loko nenikumú govoza helemino. Ómasi eza zámúza gemeneimó nene

^a 1:1 Apo 16:1 ^b 1:5 Apo 16:1

ale minoko, Izesuni gakó lamanakumú gopoguni miligitikoma, gezagi nenémini amupiló hanuva minozo. ⁹Ómasi eza lugutó vizike otopá ziki etó iki keké viziki minatave loko sele lo limimó nene oko moloko uhá ma lamaná nego lá amimó. Ezáa agikatunú geleake nasahilí hagitana lehizeletamó nene eza gozapá mikasi ale utó amike Izesu Kilistoni mututoni lilí itakumule loko lehizeletake, ¹⁰gihila zitikú nene imane gamenaló lugutó vizeaká amelaho Izesu Kilistó lemekago ámina nasahilí nene utó o lamaná imó. Áisi nene heleaká netá apele heleake, alévolé oko minoaká netá helemoaká nene aí gakó lamanatunú ale utó oletamó neve. ¹¹ Neza ámina gakó lamaná lo utó utó ve, itó aposolo itó tisá minatane loko Ómasímo nelémo etó onoimóma neve. ¹²Itó neza nenemú miluma geleaká netá nene numupiló itekago kalapusi numukú noumóza, nenemú novoza helesá amive. Neza gele alévolé onou vémini mogona gelenouve, itó nagata losi gelemoko noinake eza amuza amelaho noinazo, nigika amenoumó nene gizapa onetoloko noviko, aí gamenava alitanogo ive loko gele guni onouve. ¹³Gakó gihila geza ámegetatane loko lainim-ogetonoumó nene áminagú ale minoko Izesu Kilistotoka voko miní amenikeve loko aikumú gele alévolé oaká itó gigika kemeaká nenémini agikagú minozo. ¹⁴Ómasímini Sikalahú mulutegú minoko aleko oaká noimó áisi izokaho loló iko Ómasímo gemenei netá nene gizapa etoha oko ale minozo.

Onesipoloni gakó

¹⁵Asia mikasiuka mukí vegenalite ahuli asú inimikave. Keikutí nene Pigeloki itó Helemogeneki niasimó. Nene mota gelenane. ¹⁶Onesipoló eza kalapusi numukú minukumú avoza helemigo gamena gamena luhusáne ale kii lonetamó nenazo, Guivahanímo ezagi vegenala zuhagi milumaváini geleko agika hize kimino. ¹⁷Áisi Loma apatoka oake nenikumú vitagá ike ike nelémo utó imó. ¹⁸Guivahanímo giliko, lamaná okikoma, gamena napaló Guivahanímo agika hize amitive loko noluve. Itó Epeso numutokagi eza nasahilí onetoko hoza aleko minamó nene komasí nomimó nene lamaná gelenane.

Izesuni gimisivagi ve lamaná minati gakó

2 ¹Gipáne geza Izesu Kilistotoka voko gímizunikeve loko nasahilí lehizelimiaká noimó nenémini agikagú minoko alévolé ozo. ²Ve mukilitini kovogisaló gakó mukí lo gumumóma nene, ve lugáamú gelekako alévolé ina vegená minikikoma, ámina gakó lehizekimikako, ámináminiki vegená lugáa lainim-ikitataze. ³Geza Izesu Kilistoni gimisivagi ve lamaná loló oko minoko, gezagi gopoguni miligitatakumú

goselé gepelemino. ⁴Ami ve lilí iiki hozaváa alita vete hanuva vejenalite iki miliki itatotí apazá minanigave. Ami ve lilí itave loko kelémo etó i ve agulizaki ve nenémo giliko lagaváa gilitive liki nenémini hozagó alitune liki gilitaze. ⁵Itó lesisitakú nene ve makolímo ámina zohilímíni gizapa vevámo lesisímú lo huta gakó avutá itimó nene, gihiláa aleminogo ive. ⁶Makó eza zuhaina oko amuza moloko miluma geleko zuhá iti vémo nosánetá omolokiko goí oko nanogo ive. ⁷Guivahanímo gigika alémo zou lokiko nene, netá matá mukí gele vevesataninazo, anoza gakó láa loko lo nogumumó nenémini mogonáa geleko alémo etó ozo.

Pauló monokumule loko milumámini amupiló minamó

⁸Geza Izesu Kilistokumú gele minozo. Eza Tevitini agávolaho heleneikutí mómoká oko oti veve loko aí gakó lamaná loaká nouve. ⁹Ámina gakó lamanakumule loko gasovagi netá noguhuke, miluma geleaká nouve. Lá nouke, galana vegitana nagá zinimikago noumóza, Ómasímíni gakó nene nagá alinamamóma neve. ¹⁰Neza miluma hozaváa Ómasímo kelémo etó i vejenakumule loko gasovagi netá geheaká noumó nene keza Izesu Kilistó kugutó vizeaká netá itó alévolé lapanalagi ali lá itave loko lá oaká nouve. ¹¹Gakó makó láa loko nemó nene gakó gihila neve:

Áisi hilikú miní amunimó nekoma nene,
ezagi makó minoko aleko inogo une.

¹² ^d Miluma netá lumupiló noitiko nene,
nenemule loko goselé lepelemiko hanuva gihitunimó nene,
alika ezagi apizeko mininake
aí hozaló gizapa inogo une.

Aikumú noamive loko egamega otatunimó nene,
eza áminámini oko egamega oletanogo ive.

¹³ Leza monokú alévolé amitunimó nene,
ezáa mogonamú egamega amitimó nenazo,
eza hanuva lonoi gakotó amegesaló moloko minanogo ive.

Ómasímo hozaló vevamú giliko lamaná iti gakó

¹⁴Monó gilina vejená geí gizapaló niamó nene gakó imane ale gosohá oko lo kemekoko Ómasímíni avogisaló láa loko lo hukoko lo kemezo: Ha gakó pisila nomi gakó likivilege vino. Ámina gakó nenémo negénegé iki liva liva niago gele vejená nene kelémo golesa oaká noive. ¹⁵Ómasímo geikumú gelekiko hozaló ve lamaná loló itane loko amuza moloko minoko hoza alezo. Lá oko gakó gihiláa nene ale vevesoko lo kemeko noako, geí hozamú govoza heleaká netá nene gumupiló iteminogo ive.

^d 2:12 Mat 10:33; Luk 12:9

¹⁶Gihila nomi gakokumú vivi vovoga nilikoma, gemegesa kemezo. Lá niamó nene láa liki niviki monó ahulanigave. ¹⁷Soza gakóini nenémo litá oko halamé napa nenéminoko minoko vejená mukitoka napa oko vo alinogo ive. Ve nenémináa keikutí makó Haimeniasiko Pailitoko keza nene niasive. ¹⁸Keza nene gakó gihila ánihi satikasike ahulikásike, ligika nene hele minakutí mota otekamó nenazo, alika gosohá lugupegi lelémo oteakaláa nomive likasike monó gele vejená lugáa kilími gopá-napa niasive. ¹⁹Ómasímini vejenala zuha keza gehani lukesa hizinamó nenémini iki minikago, netá makolímó kelémo mómoká aminogo ive. Kei lukesanitó Ómasímo luhuva láa loko gizonóimóma neve:

Guivahanímó ezáa vejenala zuha ánihi vevesoaká noive.

Itó makó láa loko gizonóimóma neve:

Guivahanímíni agulizá ali mina vejená mukitoka gopa napa netáini litá iki ahuli asú iiki kemegeza amitaze.

²⁰Leza monó guluhá vejená nene lapegitana nune. Agulizaki ve makolímíni numuni napagú nene lape haitopaitolímíni golitunú itó silivatunú líl inamóma itó zatunú itó mikasitunú líl inamóma nene neve. Makó nene netá lamanakumú neve, itó makó nene ha netakumú neve. ²¹Makó keza gopa napa netá mositamó nene kígika gizopa lokiko nene, lape gihila líl ikiko, numuni amelaho lusa geko kelémo otopá zekiko, haitopaitó hoza nene numuni amelahini alitanigave. ²²Gosohá ve nenete kugupémo haitopaitó netakumú mumuzó oaká noikutí nene géisi mino otopá zezo. Lá okoko nene, gezagi itó kígika gizopa lo minago Guivahanímú voká voká liki sele liki miniaká nia vejenaki vevesoko minoaká, gele alévolé oaká, likígika kemeaká, hulu oko nonagá oko minoakakumú amuza milalo. ²³Lovaga liki gemé ziki nila gakó negi gakó ha gakó nene givilege vino. Nenémini gihila nene lova leta lava leta oaká nemó nene gelenane. ²⁴Guivahanímíni hozaló ve keza lili ali iki lova leta lava leta amiki, vejená mukí alévolekutí li kememiki hulugutí monó vevesiki lainim-ikitataze. ²⁵Kéisi legesó iki monolímíni gala véa nene kilími vevesatave. Ómasímo kagata alekiko kígika ali vilígiki gakó lamaná ánihi vevesatahe liki lá inigave. ²⁶Lá ikiko, monolímíni gala vetini kagata goha koló okiko, Satani gelehúsígú apilínigi akutí nene gologí okimikiko, Ómasímo lititoka molatitoka iki minataze.

Gamena asú inogo noiko utó ita vetini mogona

3 ¹Geza gakó makó láa loko gele hee lozo: Gamena asú inogo noiko, golesa netá utó oko puu linogo ive. ²Vegená lá iki minanigave: Kezánimú giliko itekiko, moni henonímú kumu helepelé iko miniki, kezáini iki miliki ita netalímó kumu helepelé okiko, netá matakumú aliki letiki, kezáini kugupe ali otiki, izóikini améikini gakó gili ahuliiki, netá lamaná makó kimitató lekegepoka liki mokáneve lamiki, kígika lamanaki

nomiko, ³kigikatunú nasahilí nomimó miniki, lihima ali miniki, lotoka lataka hiziki, kugupe kigikaló gizapa amiki, gala kemetameni iki miniki, netá lamanakumú gili golesa iiki, ⁴kimimika liaká iki, kogoka kagaka viziki, kezáini alími napa itiki, kigika nene Ómasiloka milamiki kigikáa nene kugupémo amu heleaká noi netató milanigave. ⁵Lá iki kugupémo nene monó kugupe itimóza, monolímimi zámuzá nene vasá zi ahulanigave. Lá iki niminiko, geza áningookoma, gemegesa kemeko kezagi apizemo. ⁶Ve nenémináagutí lugáa keza asugunatoka viki gopa napa mihina nia venalitini numúikú itiki kogoka viziki gakó li kimiki kiviligiaká niave. Ámina vená keza lihima napa genavagi ali minake, la netá lami netá nenémo kumu helekago, ⁷monokú mina vetini gakó giliaká niamóza, Ómasímimi gakó gihila gili vevesisá amave. ⁸e Ve lositá keí kugulizá Zaneke Zapeleko kéisi nene Moseni gakó pelevesava zesimó áminagó iki ámina ve kigika gopa o vimó nenete lelí monolímimi gapo ahuliake negi hiziake gopa ikave. ⁹Zaneke Zapeleko keza negi hizesimó nenémimi mogona utó imómáminiki kéisi negi nihizemó nenémimi mogona utó okiko, vejená mukitó keza ánigi asú itamó nenazo, netá matá iki miliki niamó nene nana itotí lá imi imi ititave. Ma lá aminigave.

Timotini agata alike lo asú oko lo ami gakó

¹⁰Lá imóza, makó minusike oko moloko umó itó monó lainim-oketumó itó oko moloko uke hoza alumó nenémimi mogona kelepizumó, itó Ómasimú gele alévolé oko minumó itó netá matakumú goselé nepelemigo legesó oko minumó, itó Izesuni vejená nigika kemeko minumó, itó gasovagi netá numupiló itigo amánapa oko ote minumó, ¹¹f itó gopoguni nimilinitago miluma geleko minumó, itó Atiokia numutokagi Ikonio numutokagi Listela numutokagi gopoguni haitopaitó milinitago miluma netalímimi agikagú minumó nene, némegetoko anike ánigonanimóma neve. Lá oko minumóza, Guivahanímo ámina netakutí gologí onetamóma neve. ¹²Itó vejená keza Izesu Kilistotoka viki gímiziiki monó gapoló vitamó nene keza mukitoka gasovagi netá kumupiló itinogo ive. ¹³Lá onoimóza, ve golesagi soza monó liaká vegi keza kogoka vizita vegi kogoka vizikiko iliki niva vegi nenete hoza aliliki niviko napa omo itinogo ive. ¹⁴Géisi nene gakó lo gemeaká umó nene gigika onoimóma neve. Lá okago, gakó lo gemehá vejenalitini mogona gelenanimó nenazo, nenemú ale gikitoko ale minozo. ¹⁵Geza izegipa namutó minanike apazá pepa monó gotola gatoloko noitenike, save alekanike Izesu Kilistonimú gele alévolé anikeve loko gugutó viziti gakó gelenane. ¹⁶Monó gotola pukugú luhuva gizinamó mukitó nene Ómasímimi Sikalahulímo kigika ale vávani okimikago ali utó inamóma neve. Nenegutí gatoko noguluko

e 3:8 Gá 7:11 f 3:11 Apo 13:14-52; 14:1-7; 14:8-20

monolímimi mogona lelepizeaká noive. Lá ike, lagata aleaká noive, itó gopa gakó noluko lelémo gapoló moloaká noive, itó lagata alike lelémo vevesoaká noive, itó hee loko minoko aleko ituni gapo lelepizeko lelémo vevesokiko, ¹⁷Ómasímimi vejenala gihila loló oko mininake monokú legepagi avasavagi mininake, monó hoza lamaná haitopaitolímimi aleko minanogo une.

4 ¹Neza Ómasímimi avogisaló itó Izesu Kilistó eza minoko vejená logómulagi itó helemoláagi gona mololetanogo i vémini avogisaló nene Izesú amuzavagi aniteko gizapa oletatimómave loko láa loko lo hukoko lo gimitoze, gelezo. ²Geza nene monó lo utó oko lo kimitanimó nene, vejená nenemú nokivisiko nokivisemiko gopa lo kemezo. Kagata aleko kelémo vevesoko kelémo oteko goselé gepelemiko lainim-oketozo. ³Minomo iteko gamena makó alitokiko, monó gihilamú géneka liiki ahulanigave. Lá niiki, monó nene kagatatunú giliko lagavagi minatimó nenéminigó gilitune liki tisá kilími nupa ikiko, hanuva gopa gakó kumu hiliti gakó li kimikiko, ⁴monó gihila nene kemegeza amiiki, gitene gakokú viki gímizinigave. ⁵Keza lá itamóza, géisi nene gigika gagataló gizapa oko minozo. Gasovagi netá gumupiló noitikoma, alévolé ozo. Izesuni gakó lamaná lo utó oaká hoza naleko ale géuzo. Ómasímo hoza gimimó nene ale lutegeko alezo.

⁶Nénisi hilito gamena mota alitokave. Nipili hilikiko nugupelotí miguhala nanigave. ⁷Nénisi nene hoza lamaná aleloko vumó nene mota ale asú onouve. Zohikú eza aviligigo eza aviligigo iaká niamó nenéminoko hoza ale lutegeko makiló anitekuve. Gakó gihila gizapa umó nene gologolo samimóma neve. ⁸Itó okulumakutí gonanalivagi akilí lamaná nene vevesiki miniki aliki iaká nia vejenalitinini mututoni nenémo negeva noimó nene gamena napaló Guivahani áisi ale vevesoko gona moloaká vémo nezagi mukí vejená eza anititi gamenamú lagata losi gelemoko ageva oaká nouhá vejená nene ámina akilí lehizeletanogo ive.

Vegená lugáatini gakó

⁹Geza nene nenitoka atove loko amuza moloko litá oko atanikumú noluve. ¹⁰^g Temá áisi nene mikasigú netakumú giligo, itekago, ahulonimiake Tesalonika numutoka vokave. Keleséké eza Galesia mikasiloka vokave. Taetasí eza Talamesia mikasiuka mota vokave. ¹¹^h Leza nene Lukakigó nousive. Makí nene hozagú nelémo vatí iti ve noinazo, nenemú alémoko ano. ¹²ⁱ Tikikoni nene amiselekugo, Epeso numutoka novive. ¹³^j Anogo nookoma nene, hepekumú luhoaká gó nene Toloa numutoka Kaloponi numutó gololohá o molonoumóma alenetoko

^g 4:10 Kolo 4:14; Pile 24; 2 Koli 8:23; Gal 2:3 ^h 4:11 Apo 12:12; 13:13; 15:37-39

ⁱ 4:12 Epe 6:21-22 ^j 4:13 Apo 20:6

ano. Itó monó gotolánemagi itó pepa agila makó molonoumómagi alenetoko ano.

¹⁴^k Kapatunú netá matá loló oaká ve Alesaté nene netá golesa goha alenimikaze, nenemú minoko Guivahanímo lihimala lelegí oko aminogo ive. ¹⁵Eza amuza moloko lelí monó gakokumú pelevesava zimó nenazo, áisi gelémo gopa napa okatize, gizapa etoha oko minozo. ¹⁶Goní nougo, ganá apí oko není mogonamú lo nokumugo, makolímo nelémo vatí oko hize lé onetamimóma neve. Keza mukitó ahuli asú initamóma neve. Nenémini lihima nene Ómasímo ahuloketino. ¹⁷Guivahani nenémo nasahilí onetake hize lé onetake, aí gakola lo utó oloko vinake lo lutigitane loko itó hetoka vegegalite gili asú itave loko luhusáne ale gilitonetamó. Lá noike gasovagi netalímini agepagutí asene zenetake vínasonetamole. ¹⁸Itó Guivahani eza golesa netá nemupe manamupe nelémo vatí oko asene zenetoloko voko okulumakú aí avogisaló avasavagi nelémo molanogo ive. Aí lapaná nene mino lúaló moloko minino. Lamaná.

Gekéini loketa gakó

¹⁹^l Itó imane Piliskaki vana Akuilaki itó Onesipoloni vegejala zuhagi gekéini noloketuze, nene lo kemezo. ²⁰^m Elastó eza Koliti numutoka minamó, itó Tolopimoni avisekago Mileto numutoka ahulotonouze. ²¹Geza nene golini gamena alitamiko atove loko amuza moloko ano. Eupuló eza gekeka nologetaze, itó Putené itó Linó itó Kalautiá kezagi ligivetege lugáagi nene geké niligitave.

²²Guivahanímo géi sikalahutoka minino. Ómasilokatí nasahilí nene lekelitoka mino moloko minino.

^k 4:14 1 Tim 1:20; Age 62:12; Lom 2:6 ^l 4:19 Apo 18:2; 2 Tim 1:16-17
^m 4:20 Apo 19:22, 20:4